



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 5

Yangia anidakangma : Tir Yimym

tir\_yimym

tir yimym

TAPAK 7

**Nicaragua nung yimsü temeden anema  
inyakba tatalokba 309 liasü**

**US aser Iran ktdangsiir temi  
Pakistan PM den ajuruteper**

VOL. XXIII ISSUE NO. 178 (ADOK 178) DIMAPUR AMUNGNÜ (SUNDAY) RONGCHII (APRIL) 12, 2026

₹ 5.00

## Pughoboto nung Smart Meter osang jangjashitsü

**Dimapur, April 11, 2026 (TYO):** Pughoboto nung Smart Metering atema Sensitisation/Awareness Program ka ayongzüka agiogo.

Iba sentong ya Revamped Distribution Sector Scheme (RDSS) kübok agi aser Pughoboto subdivision nung smart metering mapa dak sendakba kulitem jangjatsüogo.

"Nagaland nung power tayongzükbatem koktetsü atema smart metering ya kanga nungdaker kechiyong Nagaland nung energy agi meperir, infrastructure tashimait aser revenue shitak mangur" ta SDO (Civil) Yithachu Thur-i ashi.

Linük nung power sector reform atema RDSS nung Smart Metering ta shilem ka lir ta paisa ashi.

Pughoboto Adhoc Town nungi GB temi non-notified status ajanga prepaid smart meter enokba anena atatsü ashiba atema SDO Power (III), Kohima Division-i jangjashija liasü.

"RDSS nung shilem ana lir aser itemji smart metering aser infrastructure upgradation lir anungji nübortemi iba nung yariteptsü mepishir" ta SDO Power

(III), Kohima Division-i ashi.

"Pughoboto ya administrative headquarters ka lir anungji Revamped Distribution Sector Scheme (RDSS) kübok sorkar Offices aser Quarters dena Consumers ajak Smart Meter enoktsü inyakyim lateta lir" ta paisa ashi.

Iba sentong nung Executive Engineer, Er. Sheludi Longkumer-i scheme indang osang tejangja lemsatop.

2028 tashi smart meters ya angati enoktsü aser consumers-i prepaid aser postpaid billing tsüngda shimtsü. Smart meters nung prepaid systems nung lower tariffs lir aser balance atemyonga Rs 300 credit facility lir ta pai ashi.

Iba senden nungsa Pughoboto office nung consumers-i online payments asüba nung yariteptsü atema Billing Assistant ka ayutsü bangzüngtepogo.

Pughoboto SDO (Civil)-isa tatem nung public dang transformers aser street lighting amala infrastructure tajungba akümtsü atema smart meter enoktsü ayongzüka.

## Meghalaya sorkari UPSC aspirants yaritsü

**Shillong, April 11, 2026 (Agencies):** Meghalaya nungi Union Public Service Commission (UPSC) examination nung preliminary stage ajanteter nem senotsü teyari agütsü ta Meghalaya Chief Minister Conrad K Sangma-i metetdaksüogo.

Meghalaya nung central services nung kangabo mali aser iba atema sorkari tebilemstü abener aser sorkari candidate aika nem takok ngudaktsünür ta Conrad Sangma-i ashi.

Mapa ka ajanga khuret ajak mekoktetsü aser tang aliba inyakyim den putepa maparen inyaktsü ta paisa ashi.

UPSC prelims nung takok angur nem state sorkari senotsü

teyari agütsü. Iba ajanga parnok coaching, study materials aser travel nung yaritettsü ta CM Conrad-isa ashi.

"Iba den külemi state sorkarisa district-level programmes aser telok balala den sendaktepa coaching, training aser financial aid agütsür. Küm ishika tejakdang online preparation maparen tenzüka liasü saka COVID-19 wara ajanga iba ya anentsüsa akümba tang yanglushir tenzüko" ta Conrad-isa metetdaksü.

Lokti aser tamangba yimsü teloktem aser talisa Garo Hills nung sorkari yaria training efforts tenzüko. Iba mapa ataloktsü atema lokti ajunga longjemer yariteptsü ta paisa ashi.

## Manipur nung BSF constable ka khaset

**Guwahati, April 11, 2026 (Agencies):** Manipur kübok Ukhrul district nung yimsüng ana nungi teloktem khatepdang BSF constable ka khaset.

Hokolbar nikongdang Litan area nung Mongkot Chepu nungi Kuki-Zo nung aser Shikibung nungi Tangkhul Naga nung tsüngda khatepdang iba lendong atalok.

Yashi nikongdang 4:45 ako meta Mongkot Chepu yimsüng anasa iba ya atalok.

Iba lendong nung taküm samabaji Border Security Force 170 Battalion nungi Mithun

Mandal ta jangjaogo.

Mithun Mandal ya road security operation atema mapa lezmükja liasü aser telok ana khatepdang pa dak injang agi khashi. Iba lendong atalokba sülen pa Imphal nung anepalutsü atema anir ao saka meküzmükset.

Iba tatalokba atema bushisüngdang ka tenzüko aser ktdangsiirtemi iba tesem nung security akangshio aser aibelener aputsü bushidar.

Manipur Chief Minister Yumnam Khemchand Singh-i iba lendong atalokba atema sasaba metetdaksüogo.

## SAMARTH Northeast Innovation Hackathon 2026 tembangogo



**Dimapur, April 11, 2026 (TYO):** April 11, 2026 nü National Institute of Electronics and Information Technology (NIELIT), Kohima, Nagaland nung SAMARTH Northeast Innovation Hackathon 2026 agiogo.

Iba sentong ya NIELIT Kohima ajanga ayongzüka aser School Education Principal Director, Shashank Pratap Singh, IAS-i tetushi süa jaoker ama shilem agi.

"Iba hackathon ya NIELIT Kohima ajanga meranga inyakba kuli lir aser hackathon ya tetoktepa dang nungi tesentaktep yangluba sentong ka lir" ta Shashank-i ashi.

"Lanurtemi purapitet balala sayuba atema tenüngsang agütsür. Asenoki lokti nung

khuretem koktetsü atema bilema purapitettsüla aser tanabuba nung tanü-asung models ajanga energy kanga amshir anungji energy-efficient solutions puratetsü nungdaker" ta paisa ashi.

NIELIT Assam & Nagaland Director L. Lanuwabang-ia o jembidang "ajak ya mera ka agi tenzüker. Mera tila kaji asungbo market nung product tulu ka akümtsü akok aser tongmelang tebilemba ka ajanga purapitettsü tenzüker" ta ashi.

SAMARTH-i school level nungi tenzüker aser theory nungi practical solutions akümtsü nung temulung agütsür ta paisa ashi.

"Iba sentong ya NIELIT aser Northeastern states tsüngda amalitep ajanga inyakteter.

SAMARTH ajanga national level atongtsü nükiidong lir aser iba ya Northeastern region nung tenzüka atema kanga pelar" ta Lanuwabang-isa ashi.

Hackathon 2026 nung telok 13-i shilem agi aser PM Shri School, Mizoram-i mezüngbuba jenjang, PM Shri School, Thahekhu, Dimapur-i tanabuba aser Jalukbari Higher Secondary School, Guwahati-i tasembuba jenjangtem takok angu.

Sentong nung Additional Director, NIELIT, Daniel Meren-i tesentepertem pelaa agizük, kaketshirtemi SAMARTH programme ajanga tajangzüka anguba aser ajangshia arubatem lemsatop aser Joint Director, NIELIT Kohima, Dr. Monita Wahengbam-i anküp tepela o jembii.

## Assam nung HSLC results majungba atema show-cause notices agütsü

**Guwahati, April 11, 2026 (Agencies):** Bongaigaon district nung school 30 temi HSLC Examination 2026 nung tamakok anguba atema Bongaigaon District Circle (BDC) Inspector of Schools-i show-cause notices agütsüogo.

School 30 tema nung pass percentage 30% teküpok liasü aser iba ajanga ktdangsiirtemi academic standards aser institutional performance atema tebilemstü abener ta sangdong nung shia lir.

Inspector of Schools-i April 10 nü agütsüba sangdong nung results majungba atema temulung kanga masür aser iba ajanga rejutem nung ktdangsiirtemi, lenisüba aser tesayuba yimya majungba sayur ta shiogo.

School temi anogo tenet tsüngda results majungba atema kulitem agütsütsü mapang züngzüksüogo.

Inspector of Schools-i school shia dang subject-wise result analysis, tongtipang khuretem

aser taruba academic session nung results ajungtsü atema comprehensive action plan agütsütsü tetuyuba agütsüogo.

School temisa tesayurtem mita repringtsü aser kaketshirtemi angazükba asadangtsü indang maparen inyaktsü tetuyuba agütsüogo.

School temi mapang shitak nung telangzüba tajung magütsüra lateta aliba ama disciplinary action agitsü ta k e t d a n g s ü r t e m i metetdaksüogo.

## Mizoram village councils-i 15th finance commission grants ajunga nguogo

**Aizawl, April 11, 2026 (Agencies):** 15th Finance Commission-i lezmüksüba ama Mizoram state sorkari Rs 362 crore ajunga Rural Local Body (RLB) grants ama lema agütsüba atema tenüngsang agütsür ta All Mizoram Village Council Association (AMVCA)-i metetdaksüogo.

"2021-2026 kümsük atema Village Councils (VCs) nem RLB

grants ta ser Rs 362 crore lezmüksü aser senotsü ajakji VCs-i nguogo" ta AMVCA president F.P. Laikhama-isa ashi.

Iba atema March 28 nü final installment agütsü aser ibaji 15th Finance Commission ajanga lezmüksüba mapang nung lir ta pai ashi.

State sorkari senotsü ajunga angutsüsa mapa inyakba atema tetushi agütsür aser iba ajanga

sorkari ktdangsiirtemi tajung inyakba kuli agütsür ta Laikhama-isa ashi.

"Sorkari political tsütsü tejak meshii teküpoktiba jenjang nung terenlok mapa inyaktsü temulung agütsüba atema pelar. Village Council ajaki terenlok atema senotsü tangutsü tim nguogo aser rural sector nung senotsü kanga timi lemogo" ta paisa metetdaksü.

# Kohima nung World Homoeopathy Day amung



**Dimapur, Rongchii/April 11 (TYO):** National Ayush Mission (NAM) ajanga April 10, 2026 nü Directorate of Health & Family Welfare, Kohima nung World Homoeopathy Day munga liasü.

Iba sentong ya "Homoeopathy for Sustainable Health" omen kübok agia liasü, kong tetushi tesemdanger Dr. Akuo Sorhie, Retd., Mission Director, NAM/NHM ajanga state nung healthcare system tajungba kumda克斯üba nung Homeopathy system of

Medicine-i shilem agiba aser kongshiba indang lemsatapa liasü.

Sentong akhumsong Dr. Sentimeren Aonok, Director (Health)-i Homeopathy doctor tem dang pelaba lemsatap aser nüburttem asoshi 'sustainable healthcare' tsütsü maneni shilem agitsü ajungmesoa liasü.

Father of Homeopathy ta ajaba Dr. Samuel Hahnemann sor küm 271 ajungba temaitsü Dr. Keveduyi Theyo, Mission Director, NAM/NHM-i cake alem, kong Dr. T. Bendantgula,

Deputy Director (Ayush) menden liasü aser Dr. Seyiekhrietuo John, State Nodal Officer, NAM ajanga melepzüng o jembia tembang.

Iba den külemi department indang office kima Ayush plants nursery ka semzükbä sentong Dr. Mereninla Senlem, Principal Director, DH&FW ajanga moaja 'traditional system of medicine' ajungketsü asoshi tongtipang mera agiba aser Nagaland nung anguba indigenous medicinal plants tem wazüka ayutsü aser temaba jenjangi ajungketsü asoshi mera tasen ka agiba sayur.

Ayush Nursery ya department indang Ayush section kübok State Medicinal Plants Board (SMPB) Nagaland ajanga sentong yanglua tenzükbä lir. Ayush nursery semzükbä sentong nung Dr. Lanusunep, Consultant, SMPB menden liasü aser Rev. Velavoyi Keyho, Pastor, Phezoucha Nagamese Baptist Church, Kohima ajanga iba tesem meshiteta sarasademja liasü.

# Meluri nung Mini Legal Service Camp ayongzüük



**Dimapur, Rongchii/April 11 (TYO):** Nagaland State Legal Services Authority (NSLSA) ajanga Phek District Legal Services Authority aser District Administration Meluri den lungjemer April 11, 2026 nü Multi-Purpose Hall, Meluri Town nung Mini Legal Services Camp ka ayongzüka liasü.

Sentong akhumsong Advisor, New & Renewable Energy, NSDMA, Z. Nyusietho Nyuthe-i Member Secretary, NSLSA and Phek District dang Meluri district nung aliba nüburttem aser talisa Pochury kin asoshi bilema iba ama sentong ayongzükbä atema pelaba lemsatapa liasü.

Pai nüburttem dang iba camp nung agütsüba legal services tajungtiba nung amshitsü aser ozüing stülen anidakba senso ka-ka akumtsü ajungshia liasü.

Neiko Akami, NJS, Member Secretary NSLSA ajanga legal

services camps ayongzükbä nükjiding rateta ashi, kong legal aid angati agütsür, schemes balala mapa kuma inyaker, mangatettep bentettsür aser nüburttem temeden indang awareness agütsür.

Pai iba sentong asoshi tenüngsang agütsü aser nüburttem dang Legal Services Authorities framework kübok agütsüba services tajungtiba nung amshitsü ajungshia liasü.

Iba sentong tenzüka Kuthotso Tunyu, Pastor, TBCMT ajanga sarasadem aser Duvelu Vero, NJS, District & Sessions Judge cum Chairperson Phek DLSA ajanga pela agizükba o jembia liasü.

Sentong nung Thukutalu Chizo, Panel Lawyer PDLA menden liasü aser Holika Sukhau, NJS, Judicial Magistrate First Class-cum-Secretary, PDLA ajanga melepzüng o jembia.

# Assam Rifles-i state nung sentong balala ayongzüük



**Dimapur, Rongchii/April 11 (TYO):** Nüburttem pei sasa pei poksünga aliba yimya ajungketsü meranga Assam Rifles temi Jalukie Town nung anogo ana atema "Women Entrepreneurs Pop-Up Stalls Exhibition" ayongzüka liasü.

Iba sentong ya Pink Blossom Society den lungjemer ayongzüük, kong Peren district kübok tesem balala nungi tetsür

tem lungjemer shilem agia parnok sempet tajung sayua liasü.

Iba exhibition nung teka agi yangluba handicrafts, jewelry aser traditional jackets aser mufflers densema osettsüset balala ayok. Naro takong agi yangluba bouquets, local plants, arem nung atangba süngjang-lijang, chiyongsü balala atema stalls tem lapoka liasü.


Iba sentong nung Assam Rifles temi pei jangraba ama inyaksü ayongzüka liasü.

Ano maneni Assam Rifles temi April 11, 2026 nü Chieswema Garrison, Kohima nung aliba sepaitem asoshi motivational lecture ka ayongzüka liasü.

Iba sentong nung Colonel R K Sharma, KC, SC, SM (Retd)-i tayongzükbä o jembia, shiba Indian Army nung tejen nisung aser taoba mapang Assam Rifles nung tanishir ka liasü.

Pai Op Vijay, Op Parakram, Op Bajrang, Op Hifazat aser Op Rakshak densema tongtipang operations balala nung shilem agiba nungi ajangshibatem lemsatapa liasü.

# Mon Police-i Tizit nung Aolan Project phase-II tenzükögo



**Dimapur, Rongchii/April 11 (TYO):** Mon Police-i April 11, 2026 nü Tizit nung Aolan Project phase-II tenzüka district nung surveillance tashi itshiba aser nüburttem kumzüka ayuba ulushitsü asoshi tongtipang mera ka tenzükögo.

Iba project ya Director General of Police-i lenmang ania mapa akum, kong District Administration nungia shilem agia liasü. Phase-I ya Mon Town nung 2025 küm tenzüka liasü.

Aolan Project yagi district ajunga 'comprehensive CCTV surveillance coverage' küboki aitda克斯ür, koba security ulushitsü, law enforcement tashi itshitsü aser public safety jenjang ajungketsü asoshi lir. "Aolan" ya Konyak oshi nungi agizükba lir, koba "Eagle" dang ajar, aser iba ya

saksalem, tenük tazüng aser mitba nung teyakyak temaitsü alitsü.

Phase-II kübok Tizit nung AI amshitetba CCTV systems inokogo, kong advanced night-vision surveillance capabilities dena lir.

SDPO Office, Tizit nung control room ka amenokogo, aser iba tesem nungi real-time monitoring sütettsü aser timtem mapang tekeraba nung telangzüba agütsütsü.

Iba surveillance network yagi tongtipang inter-State entry & exit points, tongtipang lemjem tem aser arterial tulu aser Assam aser Arunachal Pradesh sendaktepba diversion lenmangtem awajemtsü.

Iba facilities yagi Tizit-Naginimora tesemtem nung gari aser nisung senzüsempongba kanga junga mittsü.

# BJP Tizit-i Mandal-Level Training sentong ayongzüük



**Dimapur, Rongchii/April 11 (TYO):** Tizit nung Pandit Deendayal Upadhyaya indang BJP Mandal-Level Training sentong ka takok ngua agia grassroots leadership tashi itshitsü aser organisational capacity ulushitsü asoshi tongtipang mera ka agiogo.

Iba sentong moaja Minister Paiwang Konyak aden aser pai karyakartas tem dang BJP tesayuba aser mapa inyakba

yimya taroktiba nung angatettsü ayongzüka liasü.

Antyodaya tesayuba nung rangloker jembidang, pai party workers tem dang nüburttem tenzüksüba, ajak awajemtsü aser linük yangerba nung bendanga agütsütsü ajungmesoa liasü.

State Mahila president, Tsachola Rothrong-i tetsür tem dang nokda克斯ü, anitsü aser tetsür nem tashi agütsüba

sentong balala ajanga agütsüba maongka agitsü ajungshia liasü.

Lai party aser society tashi itshiba nung tetsür temi shilem tajung agiba indang rateta ashi.

Iba sentong nung party workers tem tejangraba tulu nung shilem agia liasü. Iba sentong takok ngua agitetba nung Mon district team-i tongtipang shilem agia liasü.



New Delhi, April 11, 2026: Mahatma Jyotiba Phule sor kum 200 ajungba anogomong nung Parliament nung asur nem akhum agutsuba sentong nung Ato kilonser, Narendra Modi aser Congress lenir, Rahul Gandhi na ajurua mapang tatsuka jembidang tangokba noksa nung angur. Kasa noksa nung Union Minister JP Nadda aser Lok Sabha Speaker Om Birla nata angur.

## Women's Reservation Bill atema April 15 nu Opposition senden amentsu

**New Delhi, Rongchii/April 11 (Agencies):** Centre sorkari Women's Reservation ozung yanglushitsu atema April 16-18 nung Parliament nung bill ka benoktsu lia April 15 nu opposition party tem nungi lenirtem senden ka ayongzükogo.

Hokolbarnu Congress Working Committee (CWC)-a senden ka mena iba atemaji jembio.

CWC-i, election atema nuboyimba mapang ka nung West Bengal aser Tamil Nadu assembly election nung tajangzük angutsu atema sorkari temeja Parliament senden ya ayongzük, ta metetdaksu.

CWC-isa iba ozung yanglushitsu atema benoktsu aliba onüktem opposition den jelia melemsatepba atema sorkar aitsü.

Congress Tir Mallikarjun Kharge, Lok Sabha nung Opposition lenir Rahul Gandhi aser party MP Priyanka Gandhi Vadra nungeri, sorkari iba onük

nung politics asayar, ta metetdaksu.

CWC nung zungsem karibo women's reservation ozungji pusemer, ajisüaka "census-delimitation-SC/ST/women's quota" ji temzung kübok inyakyim shidak benoka inyaktsüla, ta ashi.

Senden nungji Sonia Gandhi-i zungsemtem dang, party-i Women's Reservation ya anemer ama tangar dang mesayutsüla, ta ashi.

Ano külen Congress MP, Shashi Tharoor-ia, party-i 33% women's reservation ya pusemer, ajisüaka ozung yanglushitsu atema benokba bill ji ajak den lemsatepa jembiba sülen ang agizüktsüla; iba dak alia yimtenren nung tajangzük angutsu atema mamshitsüla, ta ashi.

Shashi Tharoor-i, Centre sorkari Nari Shakti Vandan Adhinyam (2023 women's reservation law) ya yimtenren hadir ka ama mamshitsüla, ta ashi.

Hokolbarnu Congress Working Committee (CWC) senden tembangba sülen Tharoor-i X ajanga, "Amendment Bill ji federalism raksatsütsüsa aser Parliament tashi raksatsütsüsa yimtenren hadir ka mekümdaktsütsüla," ta metetdaksu.

Lok Sabha aser state assemblies nung tetsürtem nem menden shilem 33 shiteta yutsütsu atema iba ozung yanglushitsu asoshi sorkari April 16 nungi tenzüka Parliament nung temeja senden ka ayongzükogo.

Iba ozung kübok tang Lok Sabha nung menden 543 aliba nungi 816 akümtsü aser tetsürtem nem menden 273 lezmüktsütsü.

Hokolbarnu Congress Tir Mallikarjun Kharge leniba nung amenba CWC senden nungji zungsemtemi, election jaktang yimtenren tsütsü tajangzük angutsu atema sorkari temeja senden ayongzük, ta metetdaksu.

## NDA-i WB, Assam, Puducherry aser TN nung takok angutsu: Athawale

**Hyderabad, April 11 (Agencies):** RPI (Athawale) Tir aser Union Minister, Ramdas Athawale-i, BJP aser NDA-i West Bengal, Assam, Puducherry aser Tamil Nadu nung takok ngua sorkar akümtsü, aser Kerala nunga jenjang junga angutsu, ta ashi.

West Bengal nung tzüzüng-ozung dak sendakba tensa raksaogo aser tetsürtem anema inyakba kanga bulua kümogo, ibayongji nüburtemi Trinamool Congress sorkar dang mepelar, ta pai ashi.

Honibarnu Hyderabad nung osangbenertem den jembidang Union Minister of State (Social Justice and Empowerment), Athawale-i, "Tangbo BJP sorkar arutsu ta onoki amanger. Mamata Didi (Banerjee) dang tatem salem lemsateptsü, aser ibaji tejanga. Assam aser Puducherry nunga ozü sorkar arutsu. Tamil Nadu nung NDA sorkar arutsu," ta metetdaksu.

Kerala nung nüburtemi LDF aser UDF sorkar melenshiner, aser tangbo NDA-i jenjang junga angutsu, ta pai

metetdaksu.

Tetsürtem nem menden shilem 33 shiteta yutsütsu atema Ato kilonser Narendra Modi-i telemtetba agia mera tulu agiogo, ta shia Athawale-i, taruba hopta Parliament nung temeja senden ka ayongzük akaba ajanga Lok Sabha menden 816 akümtsü aser iba nungjagi menden 273 bo tetsürtem nem lezmüktsütsü, ta metetdaksu.

Menden 273 nungjagi SC aser ST tetsürtem atema reservations alitsü, ta paisa shisem.

## Delhi draft EV policy kübok gari tejen atema sen lakh 1 agütsütsü

**New Delhi, April 11 (Agencies):** Delhi nung draft EV policy kübok Delhi nung alirtemi electric gari tasen ka alizükra gari tejen atema sen lakh kaka agütsütsü.

Delhi sorkari draft EV policy ya sangdongogo.

Draft Delhi Electric Vehicle Policy 2026-2030 kübok, authorised scrapping facility kati Certificate of Deposit (CoD) agütsüba sülen ita trok tsungda electric gari tasen alirtem nem senotsu teyariji agütsütsü.

Electric gari tasen ka aliba atema scrapping incentive sen 1,00,000 agütsütsü, saka ex-factory jenjangji sen lakh 30 dang nungi tali masütsüla.

Delhi nung register asüba BS-IV garitem aser iba dang nungi jenjang tekübokba garitem atema sen lakh 1 agütsütsü, ajisüaka iba policy kübok temsüa alir mezungpur nisung 1,00,000 nem ang iba tajangzük agütsütsü.

Iba policy kübok four-wheeler goods carriers (N1 trucks) atema scrapping

incentive sen 50,000 agütsütsü. Two-wheelers atema scrapping incentive sen 10,000 agütsütsü.

Iba dak alia electric three-wheelers (L5M) tasen alirtem nem three wheelers tejen atema scrapping incentive sen 25,000 agütsütsü.

Iba policy kübok scrapping incentives ji indangindanga (direct benefit transfer) bank accounts nung inoktsütsü.

Ano iba policy benokba mapang nung Delhi nung register asüba electric garitem dang nungi road tax aser registration fees magütsü.

Ex-showroom nung sen lakh 30 tashi jenjang electric gari alirtem dang 2030 kum March 31 anogo tashi road tax aser registration fees magütsü aser strong hybrid electric garitem dang saru aser registration fees shilem 50 atoktsü.

Ajisüaka iba policy kübok sen lakh 30 dak tali jenjang electric gari alirtem dangbo road tax aser registration fees matoktsü.



April 11, 2026 nu Nadia district nung Krishnanagar Uttar constituency nungi Trinamool Congress candidate, Somnath Dutta-i nuboyima senzudang tangokba noksa nung angur.

## India nung election agiba repringtsu atema bendanger 38 aru: EC

**New Delhi, April 11 (Agencies):** Honibarnu Election Commission (EC)-i, Kerala, Puducherry aser Assam nung assembly elections agiba ya alima linüktemi tenük yoka repringogo; linük 22 nungi ketdangser 38 arua International Election Visitors' Programme (IEVP) 2026 kübok India nung election agiba inyakyim repringa asadang, ta metetdaksu.

EC-i sangdong ka ajanga, bendanger ketdangsertemi election agiba inyakyim repringba sülen 'atangji iba ya democracy benjung ka lir' ta shiogo, ta metetdaksu.

Croatia nungi Branimir Farkas-i, "India nung voting ya atangji alima ajak atema democracy benjung ka lir. Ni kanga süngmangbaji nüburtemi dak vote agütsütsü tejangraba tulu aliba ya lir. Iba inyakyim ajanga onoki tangazük dang angazüktsü; iba election ya tulu

asur shidak benshir," ta metetdaksu.

EC-isa, linük 22 nungi ketdangsertem jagi April 8-9 anogotem nung Assam, Kerala aser Puducherry semdanga distribution centres, election osettem aser election atema terenemshibatem angazüka liasü.

Election agiba anepdang bendanger ketdangsertem jagi Assam, Kerala aser Puducherry nung polling stations semdanga election agiba kulisüa repringa liasü.

"Bendanger ketdangsertem jagisa state balala nung Chief Electoral Officers aser State Police Nodal Officers den election ketdangsuba dak sendakba nung sensaksema liasü. Parnoki CCTV control room-a repring, aser ibaji 'inyakyim teladak asütsü atema tashitait tongshi lir' ta ashi," ta Election Commission-i metetdaksu.



April 11, 2026 nu Mauritius nung India-i Mauritius nem electric bus aika tenla agütsüba sentong nung India External Affairs Minister, S Jaishankar aser Mauritius Ato kilonser Navin Ramgoolam na den tangartem tangokba noksa nung angur.



## TIR YIMYIM YIMOBILEM (EDITRIAL)

DIMAPUR SUNDAY, APRIL (RONGCHII) 12, 2026

### Tsüngremi mamatetsüsa inyakba

**A**senoki Tsüngrem dang meimba aser amangbaji Pa tsüngdangbo kanga tilaka asütsü amai bilema alitsü akok. Ajisüaka, asenoki Tsüngrem pelatsüsa mapa tilaka inyakba mesüra tenla tilaka agütsüba ajanga Tsüngrem kanga pelar aser ibaji Pai teti bilemtetter. Aji oda, asenoki Yisu dang meimba ajanga alima mesama tashi asen tenüng mamatsüsa Paibo inyaker. Yisu joko alima shi taküm tembangtsü anogo mapang anasa aruba mapang ka, kenü Pa Bethani nung zütsüra aketer Simoner kidang mena alidang, tetsür kati sen jenti alangba teronem menemba toztü bener arua Pa kolak nung mezütsü. Atangji, tetsürla jagibo Yisu anogo ananü lir külen aputsü aser Yihuda nungertemi Pa südaktsütsü aser ano anogo asemnü lir Pa shia arutsü ta memeteti liasü südi. Ajisüaka, idakji alirtem dang Yisui ashiba ama, Pa mang aremtsü anogo anasai arur asünungji jelia tebu Tsüngremi iba tetsürlaji Yisu mang renemtsütsü yokba liasü ta angatetter. Tetsürla jagi Yihuda nungerti ungerter aser tezülurtemi bilemba shisatsü aser sentong kecha memetet. Lai ka dang meteta lir, ibaji Yisui Kümtetdakba aser Tsüngrem chir. La tamangji kanga tongmelang saka takang. Aji oda, lai Yisu meim, anungji Pa nem sen aika alangba jenjang teronem menemba toztü bener arua tekolak nung mezütsü. Lai iba ama ya Yisu arishirtem jashidaktsütsü asoshi mienyak, mesüra la nüngtugu akümtsü asoshia meinyak mesüra Yisu nem la nüng sangdaktsütsü asoshia meinyak. Lai Yisu kolak nug teronem menemba toztü mezüba jagi lai Yisu meimer ta kuli asü. Iba mapang lai o mejembi, sayutsüngi masü, sayatenya mapa meinyak, lai tangari meinyaktetba mapa balaka meinyak, saka Yisui la mamatsüsa aser putusa putu alima mesama tashi la bilemtetsüsa la jak ajiok. Tanü asenok nisung tsütsü bilemdi asübo, Yisu nungi langka nüngdak aginüba agi toztü sen jenjang aika alangba la kolak nung bener oagi mezütsür südi ta bilemla. Ajisüaka, iba tetsürla mulungjang nung Yisu nungi aginüba dang nungibo Yisu nem agütsünüba tuluba liasü, ibayongji lai akokba tajungtiba agütsü aser ibaji kodanga mamatsüsa Yisui ajiok. Asenok asoshia koma amala mapa ka inyaknung dang mesüra tenla kwi aben nung dang Yisui kodanga mamatsüsa ajioktsü amai bilemer. Abrahami par jabaso ka dang aliba Tsüngrem nem tarongba tenla agütsütsü mekoru, menungnang mesüra par chir melen tanga tajung ka tenladi ta memepishi. Iba anogo Tsüngremi Abraham alima otsü nung kodanga maidoktsüsa moatsü. Iba ama tamang aser temulungjang Tsüngremi aginür. Tsüngremi asen mulungjang repranger aser asen mulungjang ajunga agi Pa meimba mapa agi sayudang Tsüngrem pelar aser alima mesama tashi asen senmang alitsüsa aser asen nüng mamai bilemtetsüsa Pai inyaker. Aji oda, Mark tapu 14 nung tetsürlai Yisu meimba mapa agi inyaka sayu ama, anogo shia asenokia asen taküm yimya aser mapa agi Yisu meimba temaitsü tangar tsüngdang sayutsü nüngdaker.

## OLEMSABANG

### MAPA MEDENI TAMANG TASÜ... SAKA TAMANGJI MAPA AGI MEMETENDAKTSÜR

~ L. Kika Pongener

Tenyar Yakob-i pa shiti nung 'mapa medeni tamang tasü'...ta ashiba angur (Yakob-2:14-17). Saka ano Tenyar Paul-ibo 'Tamangji mapa agi memetendaktsür'...ta ashiba angur (Rom-3:27-28). Asenoki khen tongmelang agi bilemtsübo tenaji kati ka anema aitsüteper amai angatetsü. Anungji iba laishiba tekong ana nung ashiba yagi tongmelang tamanger karbo ratatsü...!!!??? Ajisuaka, kadang asenoki arok-aroka shisadangdir; tena pronglai ashibaji shitak ta angateter. Anungji Tenyar Yakob o Tenyar Paul na pronglai ashibaji tera rajema angatetsü merangdi.

Mapa medeni tamang tasü : "Kü adianutem, nisung kati pa tamang lir ta shira, saka mapa melira, kechi tajangzük ? Iba tamang jagi pa kümzükter ma ? Adianu mesura adianutsür ka mangsa aser anogo shia chiyungtsü agi anunga lir, aser nenok rongnung kati parnok dang ya oda shira, Junga oang, lemlema aser tepok sunga liangma; saka temang asoshi nungdak kecha parnok nem magütsüra, aji kechi tajangzük ? Yamaji tamanga mapa melira, pa kija tasü lir" (Yakob-2:14-17). Yakob-i ashiba nungjagi asenoki angatetbaji...Tamangji mapa melira tasü ta angateter, kechiyong tamanger khristan ka ta ashitsübaji pa/la mapa jagi dang pa tamangji sayutsü aser metendaktsütsü.

Tamanger khristan tajung ka ta ajatsübaji; pa/la-ji teti tekülem sentepi aotsüla, teti sarasademba taküm asütsüla; tershilem tenla shidak agütsütsüla; nisung ajak den putepa alitsüla; ajemalua tila akümtsüla; pai/lai inyakba mapa ajak nung tashishitsü kecha meli-i ochishia inyaktsüla; yimden, arogo, loktiliba ajak nung ketdangsuba mapa nung ochishia inyaktsüla. Pa/la libaliru, jaklaliru, jembishinu yimya ajak nung tangar memettsüdaktsüsa azüoka litetba taküm asütsüla. Temesepba chiyungtsü ajak nung azüoka meshiteta aliba taküm asütsüla. Ashi-auya, rakzükrakdem aser tashiyim mapa meinyaktsüla.... Nuktapangda aser japo-jari mapatem nungi asüngteta pila-a alitsüla. Pa/la-ji tamanger khristan tajung ka ta pa/la mapa ajak jagi sayutsüla. Maka-maiter, mokokmeiner, timtemer dang temeim mapa inyakba aser angadi agüja yariba nisung asütsüla. Kechi mapa inyakdir inyak-aka; Tsüngremi kechi mulonger (?) ta asüngdanga inyakba taküm asütsüla. Iba ama mapatem jagi dang pa/laji tamanger khristan tajung ka ta shitetsü....Tenyar Yakob-i ashibaji ibaji shinuba lir. ...."Yamaji nisungtemi nenok mapa tajung ngua; Kodak nung aliba nenok tebu sentsüwangshidaktsütsüsa; parnok madang nenok tesangwa jungkai adokdakjang" (Mathi-5:16). "Ne keti inyaktsü tashi alidang; shir dang tajung inyaktsü tsüa ali; parnok dang nungi soita teyu" (A.Shin-3:27). Anungji tamangji mapa melira tasü aser mapa agi dang kuli sayur ....ta item laishiba nungjagi kuli tejangja angur.

Tamangji mapa agi memetendaktsür: "Mapa inyakba ajanga asü ? Masü, saka tamang ajanga". "Anungji ozüng mapatem medeni nisung kaji tamang ajanga dang metendaktsür ta asenoki metet" (Rom-3:27-28). "Anungji tamang ajanga asenok metendaktsü nung, asen Kibuba Yisu Khrista ajanga asenok Tsüngrem den tesunep nung lir" (Rom-5:1). Tenyar Paul-i ashibaji....ozüng mapatem medeni nisung kaji tamang ajanga dang metendaktsür ta ashiba angur.

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Nicaragua nung yimsü temeden anema inyakba tatalokba 309 liasü



Pastor Rudy Palacios Vargas

**April 11, 2026:** 2024 küm Nicaragua nung yimsü temeden anema inyakba tatalokba 222 liasü, ajisüaka 2025 küm nungbo tatalokba 309 liasü, ta Khristan melungtet telok kati metetdaksü.

Iba linük nung yimsü temeden anema inyakba tatalokbatem rongnung Khristan lenirtem apuba, tekülem kitem mita reprangba, moapu nung yimsü dak sendakba sentongtem nokdangba aser Khristan melungtet telok densema organization aika anentsüba densema lir, ta UK nung amenoka aliba Christian Solidarity Worldwide (CSW)-i metetdaksü.

"Sorkar ketdangsertemi asalentong karbo melenshia yimtenren dak sendakba nung pua alirtem chiokogo ajisüaka house arrest asür, anungji parnok nukjidongjibo kasa dang. Iba ya tamangba yimsü nokdangtsü aser sorkar anema nokdakba nokdangtsü atema lir," ta CSW Director of Advocacy aser Americas Team Leader, Anna Lee Stangl-i metetdaksü.

Iba linük nung La Roca de Nicaragua Church Association tentetsang, Pastor Rudy Palacios Vargas densema Khristan lenirtem aika pua liasü.

2018 küm nūburtemi longkak aيتدang ketdangsertemi tashiyim amshiba anema pastor Vargas-i

sorkar aija liasü aser longkak aيتدertem atema sarasademja liasü.

Yaküm July 17 nü pa densema Khristan aika apu, ta CSW-i metetdaksü.

Nicaragua police aser "volunteer" officers-i Pastor Vargas den teno Jéssica Palacios Vargas aser par aianutem kinungbur ana- Pedro José López aser Armando José Bermúdez Mojica nung pua liasü. Parnoki Arogo nung deacon aser pastor Vargas'er medemer, Mauricio Alonso Petri aser par jabaso Mauricio Alonso Estrada nata apu.

Police-i parnok meyong phone aser electronic oset ajak pua ayu.

"Parnok ita trok pua ayuba mapang nung parnok kong puoka aliar kinungertem nem osang kecha memetetdaksü," ta CSW-i metetdaksü.

Petri bo tepuokdak lia August ita nung süadok, ajisüaka pa asüba kuli memetetdaksü aser post mortem agitsü temelaba magütsü.

Taküm January ita nung Pastor Palacios, Jéssica Palacios aser Armando Bermúdez nung chiok saka 'house arrest' kübok lir.

"Mapang ajak nung parnok mita repranger aser senzüsebongtsü memelar. Olga Lara Rojas, Mauricio

Alonso?Estrada aser Pedro José López nungera January ita nung chiok, ajisüaka mapang shia local police station-i oa sign asütsü tuyu," ta CSW-i metetdaksü.

Yaküm yimsü temeden anema inyakba tatalokba 309 nungi takoksa angurtemji parnok 108 bo Protestant Khristantem lir aser takoksa angur 200 Roman Catholics lir, tanüngba nisung kaji journalist liasü, ta CSW-i metetdaksü.

Nicaragua Tir, Daniel Ortega aser pa kinüngtsü/ tatong Tir, Rosario Murillo nati tekülem kitem nung inyaksangshiba ajakji teladak asütsü tuyuogo, ibayongji Khristan lenirtemi Tsüngrem O jembitsü aser sayutsüngitsü atema-a arendaker, ta CSW-i metetdaksü.

"Telongjem mesüra ochi temeden atema sayutsüngiba mesüra tepuokdak alirtem atema sarasademtsübaji-a sorkar aitsüba ama züngshitsüa akok, aser ozüng alema inyakogo ta aija tepuokdak ayutsüa akok," ta CSW-i metetdaksü.

Nicaragua nung akhidang nungi Roman Catholic Khristantem iymdong süa jajar aser Roman Catholic o Protestant napronglai Day of the Bible amonger, ajisüaka tangbo itemjia nokdangogo, ta CSW-i metetdaksü.

"Moapu nung agia aruba sentongtem joko tekülem ki telung nung ang agidaksür, aser iba atemaji-a jelia National Police (PN) dang nungi temelaba meshitsü nungdaker," ta CSW-i metetdaksü.

Iba linük nung ketdangsertemi Khristan melungtet teloktem densema organization 5,600 indang license thinentüsügo.

Tang alima nung Khristantem alitsü atema linük tamajungtiba 50 rongnung Nicaragua ya jenjang 32buba nung lir (Open Doors' 2026 World Watch List).

## ANOGO ABEN TSÜNGREM DEN

### TIYAZÜ SOBUTSÜ SOBUR ARURTEM ASOSHI KÜMDANGANG

*"Tiyazü ainkartem, shiri nenok dangi san xohutsa sobur arr saka telunglen tesashi tsünü lir, parnok asoshi kümdungang" ~ Matthew 7:15.*

Mezüng argotem tetenzük otsuji bushia ora, argotem nung yipru mopung tesashi aruba mesüka amangbapur rongnung tiyazü tesayurtem jenti pokteta, item jagi Arogo telungi Aita Tsüngrem tenüng nung o tajung jembia tema nungbo kanga dang merüka alibapur imya sayuga amangbapur liastem?ka mes?ka. Saka parnok telunglen takümüji reprangra tsünü mesükba tekülak shisatsu agi ?nger iba shisatsu tamajungji betul amangbapurtem tamang kimung raksaja tesayubatem agütsü, aser item tesayuba ajanga laguotem nung mepetmesü jenti betul arutsüba angur. Iba lia tiyazü tesayubatemji ngua Yisui Pa tenem nung sayutsüngiba mapang tatemlen ka nung iba atema kümdanga alitsü indang Pa sulin anitakba nūburtem den jembiba otem asenoki angur.

Reprangdangra ibala yimyaji mesüka tanü asen putu nung amangbapurtem rongnungi tobur tajung tiyaz? o jenti yanglua betul nūbur rongnung pei ajangzüktsü asoshi pa/ lai yangluba oji Tsüngrem o kümdakja sayua senzür. Anungji iba amala tesayuba nungi jenbua alitsu asoshi Laishiba tesayuba tangatetba nung azüiter marakzui aliba takyum kaka asyutsu merangdi.

### SARASADEM

Kibuba Yisu, shisatsu tamajung betul jajaba tesayurtem nungi ni kümzüka alitsü kü nem Ne tanela tangatetba agüjangma. Amen.

## Yisu Khristai jembiba 'Aramaic' oshi wazüka ayutsü atema akhanger

**April 11, 2026:** Syria nung meimchir temeden atema inyakertemi Syriac Khristantem oshi 'Aramaic' wazüka ayutsü aser Syria nung lisopurtem ajema akümba nokdangtsü atema inyaksü ayongzük.

2011 küm Syrian Civil War tenzükba sülen iba rara ajanga kin sasep nung prangpong amer telok aika pokteta liasü, aser iba nungji Khristan Syriac teloka densema lir.

Iba rara mapang nung Syriac Military Council (MFS)-ia Syrian Democratic Forces den senteper ISIS anema rara liasü.

Tang sorkar temzüng melenshitsüa aliba tensa ka nung Syriac Khristantem linük temzüng tasenba

nung Aramaic oshia wazüka ayutsü akhanger.

Meimchir temeden atema inyaker, Sardar Sharif-i, linük temzüng nung iba oshi (Aramaic) agizükba ajanga akhi sobaliba wazüka ayutsü aser putu aika jembia aruba oshi ya wazüka yutettsü, ta ashi.

Aramaic ya Yisu Khrista alima nung alidang Pai jembiba oshi liasü.

Sharif-i, "Iba oshi wazüka ayuba aser agizükba ajanga region nung oshi tejentiba rongnung ka wazüka ayutsü aser Syria nung kin balala tsüngda tesünep nung aliba tashi taitba akümtsü," ta metetdaksü.

A Demand For Action

(ADFA) telokia European Commission Tir, Ursula von der Leyen dang Aramaic oshi wazüka ayutsü atema tiyongtsü ia inyaktaksüner, ta mepishio.

"Public buildings nung Syriac Aramaic oshi a g i e n a d o k o g o . Northeastern Syria kübok Hassakeh nungbo Arabic aser Kurdish oshi na dang anünga lir," ta ADFA-i metetdaksü.

"Parnoki ibaji tilateri ka dang, ta ashir. Ajisüaka linük nung lisopurtem atemabo ibaji khenyongi balaka- tejashitsü lir," ta parnokisa metetdaksü.

ADFA-i, "Syriacs nungertem ya akhidang Laishiba mapang nung iba

region nung alirtem nungi jakzükertem lir. Iba mapang nungjibo Arab nung aser tangartem maliasü," ta ashi.

"Ursula von der Leyen, na ya Europe nung tashi tulutiba aliba yimtenren lenir ka lir. Nai Syria nung temelenshi aser lenmang tasen ka atema jembir. Ajisüaka Syria nung nūburtem maitsü samara atangji nungbo terenlok kecha malitsü. Sobaliba ka samatsübaji temelenshi masü. Syria nung lisportem sobaliba sendokba ya nokdangtsü atema nü dang mepishir," ta ADFA-isa metetdaksü.

Laishirtem aikati, Yisu Khrista alima nung küm asem ministry mapang

nung Pai jembiba tongti oshiji Aramaic oshi liasü, ta ashir.

Neo-Assyrian aser Neo-Babylonian rara mapang, rara sülen aser Achaemenid yimli (722-330 BC) mapang Eastern Mediterranean region nung Aramaic oshi ya ajaki jembiba oshi ka liasü aser First century AD tashi iba region nung ajaki jembiba oshi ka liasü.

Akhidang nisungtemi Greek oshi nung temelung agütsü, ajisüaka Aramaic oshi-a kanga züina liasü. 200 AD mapang nung Israel aser Middle East tesem aika nunga Aramaic oshi ya aikati jembiba oshi liasü aser 7th Century tashi tongtibang oshi ka liasü.

AO OSHI ANGAZÜKDAK:

TANÜ ANGAZÜKTSÜBA OJANG



Waset

(v) rangseta südaksüba ( kill by slit)

\* Purbai nok agi per ka waset.

Washi

(v) takok manung tepela ola tulu adoka ayimba (shout as a sign of victory)

\* Nokinketertemi takok ngur arudang nübortemi washia agizük.

OLONG PAITEP # 7471

15x15 crossword puzzle grid with numbers 1-17 indicating starting positions.

TIPLÉN

- 1. Nüji masü - (4)
3. Techinütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijjiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 7470 TELANGZÜBA

TIPLÉN :

- 2. Tesasa, 5. Men, 6. Warok,
7. Kaset, 8. Temin, 11. Süjak,
13. Talak, 14. Sadok, 15. Ele,
16. Amtsük.

LANGTSÜNGLEN :


- 1. Suwar, 2. Teroto, 3. Sadan,
4. Jenti, 7. Kinük, 9. Okadak,
10. Atala, 11. Salem, 12. Saket.

NAI-A YA METETTER



JSW MG Motor India-i yangluba Majestor SUV ajanga Guinness World Record ka yangluogo. Jammu and Kashmir nung MG Majestor ajanga 406.4-tonne train ka feet 300 tema atsür oteta liasü aser iba ajanga "heaviest train pulled by an SUV" otsü yangluogo. Iba sentong ya Kakapora aser Awantipora stations tsüngda operational railway track ka nung agia liasü.

Itanagar nung asür tesayur Yapi Potom atema rally ka agi



Itanagar, April 11, 2026

(Agencies): Arunachal Pradesh yimtiba Itanagar nung April 10 nikongdang nisung aika adenshir Yapi Potom nem tetushi agüja candlelight rally ka agiogo.

Tan hopta tetenzüklen Yapi Potom ya lar chir ana tsüngdang tepseta liasü.

Iba sentong ya Arunachal Teachers Association (ATA), Itanagar Capital Region-i Central Executive Committee aser civil society groups balala den külemi ayongzüka agiogo.

Potom ya Government Secondary School, Chimpu nung junior teacher ka liasü aser April 8 nü lar ki anasa Daksen Riram-

i nok agi lepset.

Police-i Daksen Riram puogo saka kechiba pai Potom tepset kuli ano menguteti bushisüngdang südar.

Hokolbar nikongdang 4 ako nungi 6 ako tashi Akashdeep Complex nungi tenzüker Tennis Court, Indira Gandhi Park tashi candlelight rally agia liasü.

Tetsür teloktemi anir lokti balalai Potom tepsetba aitsüba metetdaksü aser Arunachal Pradesh nung tesayurtemi la asüba ya academic community atema takoksa tulu ta metetdaksüba den tesayurtem

lendong nungi kümzüka ayutsü takhangba agütsüogo.

ATA-isa ketdangpurtem ochishia bushisüngdangtsü aser ozüng maparen fast-track asütsü ayongzüko. Parnokisa aibelenertem tatishitsü keta merenshitsü takhangba agütsüogo.

Külen, Galo Welfare Society (GWS)-ia iba tatalokba khukhua aitsüba metetdaksüogo.

Iba ya tesempatsü mapa ka aser tai tonglokja alisang ozüng tesashitiba agi merenshitsüla, Potom'er tanur anal ajar kümdaksüogo ta social activist Jarjum Ete-i takhangba agütsüogo.

Potom kinungbo yaküm shiranga asüba sülen la amia dang lia aru.

Mizo kaketshirtemi ILP system akangshitsü ayongzüker

Aizawl, April 11, 2026

(Agencies): Mizoram nung kaketshir telok tongti Mizo Zirlai Pawl (MZP)-i Inner Line Permit (ILP) system akangshitsü ayongzüko.

Mizoram-i permits shitak mebeni non-locals aika arur ta MZP-i ashi.

Aizawl nung MZP federal council senden amendang iba bangzüng ya renem ta MZP general secretary Lalhminganga

Chhange-i ashi.

Parnoki state sorkar dang ILP system akangshitsü aser modernize asütsü ayongzüksü lemtet ta paisa ashi.

Mizoram nung lisopurtem maitsü aser tarutsü kümzüka ayutsü atema ILP system ya kanga tongtipang ta MZP president C Lalremruata-ia ashi.

Lalremruata-isa kongsang balala nung MZP tanishirtem dang ground-level monitoring

ulushitsü aser ILP system tajungba inyaksü ayongzüko.

MZP-isa linük aser bendanglen alir "Zofa" (ethnic Mizos) tsüngda maitsü tsütsü tebilemtsü ajuruba asoshi benoka jembi.

Zofa nunger ajak longjema alitsü asoshi tenangzüka agia inyaker saka nisung kari pei ajangzüksü asoshi Mizo maitsü mamshitsüla ta MZP-isa metetdaksüogo.

Tripura-i Rs 2,500 crore tashi agreements 50 nung sign asü

Agartala, April 11, 2026

(Agencies): Tripura-i Hyderabad nung investors' roadshow ka alidang agreements 50 nung sign sütep aser iba ya Rs 2,500 crore tema investment commitments atema lir.

Iba sentong ya "Destination Tripura - Business Meet 2026" ta ser agi. Department of Industries and Commerce-i Begumpet nung hotel ka nung ayongzüka agi.

Industries and Commerce

Secretary Kiran Gitte-i investors dang policy support, simplified procedures aser time-bound clearances agütsütsü nangzü.

Industries and Commerce Director Deepak Kumar-ia information technology, healthcare, tourism, agriculture, food processing, rubber, bamboo, agarwood, renewable energy, textiles aser handicrafts nung investment asütsü lenmangtem lemsatet.

Iba sentong nung wadang balala asoshi proposed investments atema agreements agia liasü aser iba ya Rs 2,500 crore tema atema liasü ta ketdangsürtemi ashi.

Taküm küm tatemlen "Destination Tripura: Business Conclave 2026" agitsü aliba jakdang investor engagement asütsü aser state renema aliba metetdaksütsü asoshi road show agir ta ketdangsürtemisa ashi.



April 11, 2026 nü Tirap district kübok Tutnu yimtsüng nung Tutsa nunger Pongtu Kuh benjung amungdang agiba noksa angur. Arunachal Pradesh kübok Tirap aser Changlang district tem nung Tutsa nunger lir aser parnok alemli talidakji Tutnu yimtsüng liasü ta züngshir. Iba sentong nung tongti tesemdangerji Tirap nung Zilla Parishad Chairperson (ZPC) Advocate John K.K. Matey aser tetushi süa jaokerji Tirap Superintendent of Police, Aditya (IPS) na liasü aser 55-Khonsa East Assembly constituency nungi MLA Wanglam Sawin-i Chief Patron ama shilem agiogo.

# Israel-i Gaza nung Palestine nunger nisung 7 tepset



Central Gaza Strip nung aliba Bureij refugee camp ka nung Israel-i April 11, 2026 nü amakdang tepsetba tasümang anasa Palestine nunger mang ayimba noksa nung angur.

**Gaza City, Rongchii/April 11 (Agencies):** Israel-i Gaza Strip central aser southern tsütsü tesem balala amakba mapang Palestine nunger nisung 7 tepset aser kar yirutsü.

Israel indang drone kati central Gaza nung aliba Bureij refugee camp nung police post ka anasa missiles ana khaloktsü, ta Gaza indang civil defence rescue service odongtar Mahmoud Bassal-i Honibarnü osangbener dang ashi.

Medical osangtemia anepdang yakta amakba osang ya jangjatsüogo aser iba mapang Bureij künok "Block 9" area nung aliba civilian telok ka dak kongshi. Nisung kar yiru aser kar kanga sashia yirutsü ta parnokkia ashi.

Central Gaza nung aliba al-Aqsa hospital-i tasümang trok aser yirur aliba nisung tenet bener aru aser yangji par pezü kanga sashia yirur lir, ta osangbener dang ashi. Iba anasa al-Awda hospital nunga tasümang ka aser yirur alir ka bener aru ta ashi.

Ano southern Gaza Strip nung Nasser Medical Complexia Khan Younis anüdoklen Bani Suheila jila nung tesem balala nungi adenshia aliba süki ka nung Israel nungeri drone amshia amakba sülen yirur aliba nisung asem parnok dangi anir aru ta ashi.

Israel-i kin ajunga samatsütsüsa Gaza nung raraba October 2023 nung tenzüker nisung 72,300 dak

tema tepsetogo aser yangji nisung 738 shi taoba küm October ita ceasefire tenzüka sülen tepset, ta Gaza Ministry of Health ajanga ashir.

April ita tenzüker nisung 32 süogo, aser yangji Al Jazeera osangbener Mohammed Wishah dena lir, shiba hopta tetenzüklen Gaza City anüolen amakdang tepseta liasü.

Israel-i tawa Gaza Strip nung azüdkshiba ya Hokulbarnü United Nations human rights chief Volker Turk-i aitsü aser taochi makai tepsetba ajanga ozüng balalai Israel memerenshitetba sayur ta ashi.

"Tesüiba anogo 10 nunga Palestine nungertem tang tashi parnok ki, parnok jenokdak aser süki, yimdong, mozüki aser classroom nung tepseter," ta Turk-i ashi.

Maneni occupied West Bank nung Israel nunger aser sepaitemi Palestine nunger aliba ki aser yimtsüngtem agiyonga parnokki ozüng alema dangar li nung oa aliba maparen maneni tesashiba inyaker.

Israel sepaitemi Qalqilya anüdoklen nisung tenet apu aser ano Jenin yimti anasa Bir al-Basha nunga nisung kar pua asüngdangya asü ta ashir.

West Bank nung tawa ang ozüng alema settlements tasen 34 tashi miima mela ta ashir, aser 2022 küm Israel Ato Kilonser Benjamin Netanyahu shimba sülen par sorkari yamaji settlements 68 tashi melaogo.

# US aser Iran ketdangsür temi Pakistan PM den ajuruteper

**Islamabad, Rongchii/April 11 (Agencies):** US aser Israel nati Iran den rara aliba tatem kati arutsü atema tezüngzüktep ka yanglutsü asoshi balala jembishinü akatsü atema Iran aser US ketdangsür temi Honibarnü Islamabad nung Pakistan Ato Kilonser Shehbaz Sharif ajurua liasü.

Jembishinü ya Islamabad nung aliba Serena Hotel nung tenzüker, kong Iran ketdangsürtem ya parliamentary speaker Mohammad Bagher Ghalibaf-i anir Shehbaz Sharif den senden amen aser iba sülen US Vice President JD Vance, White House envoy Steve Witkoff aser Trump'er apang Jared Kushner nunger den ajuruteper liasü.

"Delegations anaprongi tajung asoshi jembishinütsü temulungtetba nung inyakba asoshi tenüngsang agüja Ato Kilonser-i iba ya region nung mapang talangka yimjung alitsü asoshi mera tetenzüker asütsü südi ta imlar ta ashi," ta Sharif indang office ajanga ashi.

Iba sensaksemba nung Pakistan Foreign Minister Ishaq Dar, Army Chief Asim Munir aser Interior Minister Mohsin Naqvi nungera shilem agir. Sharif-ia Pakistan-i region aser alima nung yimjung alitsü asoshi tetsüngtai ia jembishinüba nung maneni

bendanga agütsür nokdaksü tangatetba lir ta ashi.

Iran sorkari azüokba media ajanga ashiba agi, jembishinü ya kechi yimya ka nung alitsüar ano mejangja aser telok ana ya tejak o tejak jitepa ajurutsü asü mesüra maneni Pakistan ketdangsür ajanga osang belenteptsüar ano mejangja.

Rara teti asoshi tembangtsü atema tezüngzüktep agiba nung Iran rongsen soita aliba salatsüla aser Israel-i Lebanon nung Hezbollah anema raraba tembangtsüla, ta Iran-i akhanger, koba Vance-i mejembitsü amai shia lir.

Sanction, Lebanon aser tongtipang Strait of Hormuz lapoktsü densema tongtipang onüktem nung parnok tang tashi meta agi pila lir ama ajiteter aser parnokki temulung melemtepeba miimshitsü memeranger. Iran Foreign Minister Abbas Araghchi-i, United States-i nangzüka ama meinyakba aser ashioktsüba ajanga temulung melemei Tehran jembishinü nung tetsüng ajemoker, ta shia lir.

Vance-i US nungi mapusodang, parnokki tangatetba tajung nung jembishinü akatsü mulunga lira asenoki teka salatsü mulunga lir, ta ashi. US-i hopta ana ceasefire nung condition ka ama Strait of Hormuz lapoktsü khanga liasü.

# Russia aser Ukraine nati tepuokdak alirtem melentep



**Moscow/Kyiv, Rongchii/April 11 (Agencies):** Hokulbar aonung nungi Honibarnü Russia aser Ukraine nati tepuokdak alirtem melentep saka Orthodox Easter asoshi khen atema ceasefire tenzüksü ghonda ishika lia ano drone amshia linük kati ka amak ta ketdangsür temi ashir.

Khen asoshi rara anena ataba nung Russia-i aibelenba atema "in kind" nung telangzüba agütsütsü, ta Ukraine Tir Volodymyr Zelenskyy-i ashi.

Linük anaprongi prisoners of war 175 melentep ta jangjatsüogo, koba tang teraradak mapanga amalitep akaba ajiteter.

Iba ya United Arab Emirates tetsüngtai ia jembia melentepba lir, ta Russia indang defence ministry ajanga ashi.

Ajisüaka ceasefire tenzüksü liaka tensa

mejungi lir. Russia-i Honibar anepdang tashi drones 160 khalokja eastern aser southern regions nung nisung pezü tepset aser ter dak tema yirutsü ta Ukraine ketdangsür temi ashir.

Southern Odesa region nung tesashitiba kongshi, kong nisung ana asü aser civilian infrastructure kanga sashia raksatsüba osang lir.

Kasa mapang Ukraine indang drone agi amakba ajanga Russia indang Krasnodar region nung oil depot ka nung mi adok aser nisung aliba ki ka raksatsü, ta ketdangsür temi ashi.

Iba yagi rara khen asoshi anena ataba nung tashi maitba sayur, aser tepuokdak alir melentepba amala inyakyim mapang kanga ajema amalitep akaba ajangshia arur.

**Signal for Healthier You!**

**LIMIT** eating processed, fried, and unhealthy food

**THINK** and choose a balanced meal with the right mix of proteins, grains, and vegetables

**GO** for fresh fruits, vegetables, and whole food

#StopObesity

Follow us: fssaiindia fssai fssai\_safefood fssaiindia fssai\_india

State Food Safety Authority, Department of Health and Family Welfare, Govt. of Nagaland.

## Premier League: Bournemouth-i Arsenal akok, Man City teimla lir



London nung Arsenal aser Bournemouth tsungta English Premier League asayaba mapang Bournemouth nungi Alex Scott-i par telok atema tanabuba goal agüja Arsenal madak 2-1 agi akok.

**London, Rongchii/April 11 (Agencies):** Bournemouth nungi Alex Scott-i Premier League title asoshi lenmang tesadamba lapokja The Emirates nung asayadang Arsenal madak 2-1 agi akokba nung pai takok goal ya agüja liasü.

Honibarnü midfielder Scott-i minute 74 buba nung goal ka ya agütsüteta Manchester City asoshi teimla tulu agütsü.

Bournemouth-i takok nguaka Arsenal ya City dang point toku agi timba lir, ajisiüka Pep Guardiola'er telok ya asaya ana tajemba asaya lir aser parnok Deobarnü Chelsea madak takok ngura, tawa ajema akumtsü.

Ibai Arsenal asoshi league games toku nung tamakok

mezüngbuba alitsü aser parnok 32 ben asayaba nung points 70 lir aser City ya 30 ben asayaba nungi points 61 lir. Taruba hopta tatemlen Arsenal ya City nung oa asayatsü lir.

Mezüng half nung Bournemouth ya tajungba asayateta Eli Junior Kroupi-i asaya tenzüker minute 17 buba nung goal ka agütsü. Taküm season nung Kroupi asoshi ibaji goal ter buba liasü.

Ajisüaka Arsenal tera zübazüyima asaya.

Bournemouth nungi Ryan Christie-i penalty area nung pa teka agi ball nung kongshia minute 35 buba nung spot nungi Viktor Gyokeres-i goal ka agütsü.


Iba sülen Arsenal ya takok angutsü meranga asaya, saka Bournemouth ya yimya balala nung asayateta jenjang toku buba tongogo aser European qualifying spot atema teimla lir. Arsenal ya Premier League nung asaya pezü tashi atongtepa takok ngur iba asaya tenzüker, aser iba asaya nung akok asübo parnok 2004 sülen tang mezüngbuba iba takok marok ajungkettsü jenjang tajungba akumtsü liasü.

Parnok ya Premier League nung ita ka jungnüa masayai arur, ajisiüka idangjia parnok League Cup final nung City-i akok aser FA Cup quarterfinal nungia second-tier Southampton-i tsükdaktsüogo.

## Badminton Asia Championship: Ayush Shetty final tongogo

**Ningbo, Rongchii/April 11 (Agencies):** India nung badminton asayar Ayush Shetty-i Honibarnü Ningbo Olympic Sports Centre nung tebur kija semi-final asayaba mapang Thailand nung World No. 1 aser Paris 2024 silver medallist Kunlavut Vitidsarn aoksatsügo.

Mezüng set tembangba mapang Shetty-i takok angutsü teimla kangabo meliasü, saka tena ghonda ka sen minute 15 asayaba sülen pai 10-21, 21-19, 21-17 agi seed tematiba nung alisang akok.



Ayush Shetty

Ayush iba asayamung final nung Chinese Taipei nung fourth seed Chou Tien Chen mesüra second seeded Chinese Shi Yu Qi den asayatsü.

Vitidsarn aser Ayush na tesüiba mapang Arctic Open asayamung taoba küm asayaba nung ajurua liasü, kong straight games nung Vitidsarn-i akok.

Mezüng set nung Vitidsarn-i ayong ayonga Ayush madak 21-10 agi takok ngua liasü aser tesem melentepba sülen Ayush ya tekumdangba nung tenzüka mapang ka Ayush 7 aser Vitidsarn 1 ta liasü.

India nungbai kanga meranga ali nung jozüa asaya aser anisüngzüka mapang 11-4 agi ta temaba nung liasü.

Iba sülen pai aiben aibelenba yong Vitidsarn ya jenjang tajungba kuma 13-11 akum aser 16-11 agi pa India nungba jaldangi atu.

Ajisüaka Ayush-i temulungsentsü ajak agi asaya aser yangji tajanzük ngua liasü.

Game tasembuba nunga 4-1 agi Ayush tajungba jenjang nung tenzüker aser pai tesülen meyipa mereprangi kasa jenjang nung asaya liasü.

Mapang ka Ayush ya 19-13

agi jenjang tajungba nung liasü aser idangjia Vitidsarn-ia bendaga agütsür asaya. Saka Ayush-i pa dak tamang kateter liasü, anungji Dinesh Khanna sülenbo India nung tebur kija badminton asayar iba asayamung final tongteter Ayush Shetty ya alitsü. Khanna-i 1965 küm iba asayamung nung gold angu aser tang tashi India nung katia pa ama asayateta mali.

Iba asayamung nung tebur kija asayar HS Prannoy-i 2018 küm medal ka anguba sülen tang Shetty-i silver mesüra gold ka angutsü tejangja kumogo.

Ayush ya quarter-final nung world No. 4 nung alisang Indonesia nung Jonatan Christie madak Hokulbarnü 23-21, 21-17 agi takok ngur semi-final ya tongteta liasü.

Ayush ya World No. 25 aser US Open Super 300 nung tang champion lir, shibai Brehostibarnü Chinese Taipei nung Chin Yu Jen madak straight games nung takok angu.

India nung anaben Olympic medallist PV Sindhu iba asayamung round tanabuba nung tzükogo aser Lakshya Sen ya mezüng round nung tsükogo.

## 12 buba Phom Monyu Open Volleyball Tournament tembangogo



**Dimapur, Rongchii/April 11 (TYO):** Longleng Town Students' Union ajanga Longleng District Volleyball Association den lungjemer Public Ground, Longleng nung ayongzüka 12 buba Phom Monyu Open Volleyball Tournament tembangogo, koba April 7-10, 2026 anogotem asaya liasü.

Iba asayamung nung team 12 arua tejangraba tulu nung shilem agia liasü.

Iba asayamung tenzüksür P.O, DRDA Longleng, P. Angam Longho-i tanü lima nung saisapong tongtipang akumba indang lemsatop aser saisapong ya career tajung ka kumogo ta ashi.

Saisapong ajanga alimai metetba, yimya balala aziökba indang pai lemsatop aser lanurtem dang pei sempet koba mapang amshitsü, aji angatetsü ayongzüka liasü.

Longho-isa lanurtem dang pei sempet tajungtiba nung amshitsü aser pei tashi aser sempet meteta alitsü nenshia ashi. Tamakok ya tatembang masü saka takok angutsü atema mera ka lir, anungji metokmeperi nungi angazüksüla aser temulungtetba nung tejakleni aotsüla, ta pai ashi.

Paisa nükmeremba nungi pila alitsü, kati ka yaritsü aser ajungmesotsü, telungjem adokdaksütsü aser tajunglen nungi tokteptsü ayongzüka liasü.

Iba asayamung tanabuba aser tasembuba anogotem match patrons ya PSC tir Shame Pho maser LDVA tir L. T. Hentok liasü.

Asayamung tatembangba anogo nung sentong shibangtsür ya Assistant Commandant Nagaland Village Guard, L.K. Heno Khiamniungan liasü, aser

pai Longleng nung lanurtem asoshi sapang tajung agütsüba atema organizing committee nem tenüngsang agütsü.

Pai ajak dang tajunglen nungi tokteptsü, telungjem, kati ka akumtsüboa alitsü ajungmesoa liasü.

Iba asayamung nung champion ya Anaki Phom Volleyball Association liasü aser runner-up jenjang United Rising Sporting Club, Yimchong-i ngutet.

Kasa mapang Best Spiker sempet Wonglom (Anaki Phom Volleyball Association), Best Setter sempet Abu Okla C. Phom (URSC Yimchong), Best Libero sempet P. Shingjei (Yongphang Students' Union), Best Discipline Team sempet Hukphang Students' Union (B) aser Player of the Tournament sempet Bauaok (Anaki Phom Volleyball Association) nem agüja liasü.



New Delhi: Taoba mapang junior world aser Asian champion, Sainyam-i Honibarnü Granada, Spain nung aliba Las Gabias Shooting Range nung International Shooting Sport Federation (ISSF) World Cup Rifle/Pistol leg tetsür 10m air pistol final nung 178.9 khateta jenjang pongububa tongteta liasü, koba la asoshi record tajungtiba alitsü.

## BILEMDANGANG

"Asenok ajaki takum nung khenbo dangar ket nungi teyari nungdaker."